

Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaat (Piffissamik akitsuutit akilerneqartussanngorfiannik erseqqissaaneq, imigassanik aalakoornartortalinnik nammineq atugassanik eqqussisinnaaneq, tikinnermi akitsuusiisitsisinnaaneq aamma aningaasat atoriaannaat pillugit maleruagassanik allannguneq)

§ 1

Nioqqutissanik eqqussuineq annissuinerlu pillugit Inatsisartut inatsisaanni nr. 18, 30. oktober 1992-imeersumi, Inatsisartut inatsisaatigut nr. 38, 9. december 2015-imeersukkut kingullermik allanngortinneqartumi makku allannguutigittinneqarput:

1. Inatsimmi tamarmi peerneqarpoq: "nr. 19, 30. oktober 1992-imeersoq".

2. Kapitali 2-p qulequtaa ima oqaasertaqarpoq:

"Akitsuuteqarfusoq aamma akitsuutit akilerneqartussanngorfiat"

3. § 6-ip kingornanut ilanngunneqarpoq:

" § 6 a. Akitsuutit akitsuuteqarfusumut tikinnermi akilerneqartussanngussapput, taamaattorli tak. imm. 2 aamma § 40.

Imm. 2. Danmarkimiit Kalaallit Nunaat ornillugu umiarsuakkut usinik assartuinermi nioqqutissanillu nassiusinnermi akitsuutit akilerneqartussanngussapput piffissami, umiarsuup Danmarkimi umiarsualivinni aallarfigisaani tamani aammalu aqputaani ingerlaarfiani usit nioqqutissalluunniit usilersuunneqarfiini."

4. § 7 ima oqaasertaqarpoq:

" § 7. Immiaaqqat, viinnit, imigassallu kimittuut ethanolimik akullit Nioqqutissanik eqqussuinermi akitsuutit pillugit Inatsisartut inatsisaanni § 1, imm. 1, nr. 3-mi pineqartut taamaallaat akileraaruseriffup akuersissuteqarneratigut akitsuuteqarfusumut eqqunneqarsinnaapput, akitsuuteqanngitsumik eqqussineq inatsimmi uani § 11 imaluunniit § 17, imaluunniit Nioqqutissanik eqqussuinermi akitsuutit pillugit Inatsisartut inatsisaanni § 2, imm. 2, aamma § 3, nr. 2 aamma 3, naapertorlugit pinngippat.

Imm. 2. Akileraaruseriffiup imigassanik aalakoornartortalinnik sassaalliisinnaanermut akuersissummik peqartut immiaaqqanik, viinninik imigassanillu kimittuunik ethanolimik akulinnik imm. 1-imi taaneqartunik, inuussutissarsiutigalugu tuniniaqqitassatut eqqussisinnaanernannik akuersissuteqarfigisinnaavai.

Imm. 3. Akileraaruseriffiutaaq inuit 18-inik ukiullit ukioqqortunerusulluunniit Kalaallit Nunaanni najugaqartut piffissalluunniit qanittup ingerlanerani Kalaallit Nunaanni najugaqalersussat immiaaqqanik, viinninik imigassanillu kimittuunik ethanolimik akulinnik nammineq atugassaminnik eqqussisinnaanernannik ataasiartumik akuersissuteqarfigisinnaavai. Ataasiartumik akuersissut atorunnaassaaq nassiussat akuersissummi pineqartut tigusissusamat tunniunneqarpata. Akileraaruseriffik ataasiartumik akuersissummik tunniussiumanngissinnaavoq, akileraaruseriffik siusinnerusukkut akuersissutaasut qassiuneri, eqqunneqartut annertussusii il.il. eqqarsaatigalugit isumaqaruni eqqussuineq nammineq atugassaannarnut tunngasuunngitsoq.

Imm. 4. Ataasiartumik akuersissutinik imm. 3-mi taaneqartunik tunniussinnginnermi piumasaqaatit makku naammassineqarsimassapput:

- 1) Akileraaruseriffiup elektroniskiusumik qinnuteqaat nioqqutissat Kalaallit Nunaannut nassiussassatut tunniunneqarnissat ullunik suliffiusunik ikinnerpaamik 5-inik sioqqullugu tigusimassavaa. Qinnuteqaat elektroniskiusumik immersugassaq akileraaruseriffiup suliarisimasaa atorlugu tunniunneqassaaq, nioqqutissallu nassiussaniittussat pillugit paasissutissanik erseqqissunik immersorneqassalluni, akileraaruseriffiup tamatuminnga ilitsersuinera naapertorlugu.
- 2) Nioqqutissat eqqunniarneqartut akitsuutaat, aamma imm. 5 naapertorlugu akiliisitsissut akileraaruseriffimmut akilerneqarsimassapput.
- 3) Nioqqutissat umiarsuakut timmisartukkulluunniit imaluunniit allakkatigut nassiussatut eqqunneqassapput.

Imm. 5. Immiaaqqanik, viinninik imigassanillu kimittuunik ethanolimik akulinnik imm. 1-imi taaneqartunik nammineq atugassanik eqqussiniarluni ataasiartumik akuersissuteqarfigineqarnissamik qinnuteqarnermi, qinnuteqartup akiliisitsissut 250 kr.-iusoq, kiisalu tapiliussatut akitsuut eqqussuinnermi akitsuutit naatsorsorneqartut 50 pct.-iattut angitigisoq akilissavai. Akiliisitsissut tapiliussatullu akitsuut kingusinnerpaamik akilerneqassapput qinnuteqaatip tunniunneqarnerani.”

5. § 8 atorunnaarsinneqarpoq.

6. § 12, imm. 1, ima oqaasertaqarpoq:

” Akuersissutit § 7-imi taaneqartut, inatsisit allat naapertorlugit tuniniaaqqusiunnaartoqarnerani imaluunniit killilersuinnermik aqqissuussisoqarnerani Naalakkersuisunit atorunnaarsinneqarsinnaapput uterteqquneqarsinnaallutilluunniit.”

7. § 15, imm. 1, ima oqaasertaqarpoq:

” Nioqqutissat Kalaallit Nunaanni inuussutissarsiutigalugu nioqqutissanut allanut, aamma nioqqutissanut akitsuusigassanut atorneqartut akitsuutaat, § 14 aamma Nioqqutissanik eqqussuinnermi akitsuutit pillugit Inatsisartut inatsisaat naapertorlugit akilerneqarsimasut Naalakkersuisunit utertinneqarsinnaapput.”

8. § 15, imm. 2, atorunnaarsinneqarpoq.

9. § 16-ip kingornanut ilanngunneqarpoq:

” § 16 a. Nioqqutissat kukkusumik akitsuusertinneqarsimasut, tammarsimasut, ajoqusersimasut, tillinneqarsimasut, suujunnaarsinneqarsimasut imaluunniit sumiiffinnut, Kalaallit Nunaata illersorneqarnissaa pillugu isumaqatigiissut 27. april 1951-imeersoq naapertorlugu illersornissamut sakkutooqarfiusunut anninneqartut akitsuutaannik utertitsisarneq pillugu maleruagassat Naalakkersuisunit aalajangersarneqarsinnaapput.

Imm. 2. Imm. 1 naapertorlugu utertitsinerni akiliisitsisummik 1.000 kr-it qaangernagit angissusilimmik aammalu aningaasat utertinneqartut procentinngorlugu ilaannik akiliisitsinissaq pillugu maleruagassat Naalakkersuisunit aalajangersarneqarsinnaapput.

Imm. 3. Akitsuutininik utertitsinermi qinnuteqaatip, immersugassaq assigisaaluunniit akileraaruseriffimmit atoqquneqartoq atorlugu digitaliusumik akileraaruseriffimmut tunniunneqarnissaa, uppersaammillu, soorlu fakturamik, nassiussat allagartaannik, akitsuutit allagartaannik uppersaataasinnaasunillu allanik qinnuteqaammut ilanngussisoqarnissaa Naalakkersuisut aalajangersinnaavaat.”

10. § 22, imm. 1, ima oqaasertaqarpoq:

” Nioqqutissanik eqqussuineri akitsuutit pillugit Inatsisartut inatsisaat naapertorlugu akitsuutit, nioqqutissat akitsuuteqarfiusumut eqqunneqarneranni akiligassanngussapput, taamaattorli tak. § 7, imm. 4, nr. 2.”

11. § 26, imm. 2, ima oqaasertaqarpoq:

” *Imm. 2.* Akitsuutininik pillaammillu akiliisitsisummik akiligassat aamma suliap suliarineqarnerani aningaasartuutit akileneqareerpata nioqqutissat tigummigallaraneqartut arsaarinnissutigineqartulluunniit, eqqussuineri maleruagassat nalinginnaasumik atuuttut malilluinnarlugit inummut nioqqutissanik pisassaqaarnerminik uppersaasumut tunniunneqassapput.”

12. § 26, imm. 2-p kingornanut ilanngunneqarpoq:

” *Imm. 3.* Nioqqutissat tigummigallaraneqartut akitsuutaat akitsuutit akileneqartussanngorfisa kingorna qaammatit marluk qaangiutsinnagit akileneqanngippata, nioqqutissat akitsorterussinikkut nalunaarutigineqareersimasuk Kalaallit Nunaanni ileqqusut malillugit tuniniarneqassapput. Nioqqutissalli akileraaruseriffiup isumaa malillugu atorsinnaanngitsut tunineqarsinnaanngitsulluunniit piffissaliussap qaangiunnerani nakkutigisaasumik suujunnaarsinneqarsinnaapput. Aningaasat akitsorterussinermi isertinneqartut siullermik pisortat toqqortarinninneranni tuniniaanerannilu aningaasartuutininik matussutigineqassapput, tulluillugit akitsuutininik pillaammillu akiliisitsisummik akiligassat aamma suliap suliarineqarnerani aningaasartuutit. Sinneqartoortaaajunnartut piginnittumut tunniunneqassapput, taanna akitsorterussinerup kingorna ukioq ataaseq qaangiutsinnagu saaffiginnippat nioqqutissanillu tunineqartunik piginnittuunerminik uppersaappat.

Imm. 4. Nioqqutissat anngiortumik eqqussuineri eqqusserialuarnermiluunniit nassatarineqartut tigummigallaraneqassapput. Nioqqutissat anngiortumik eqqussat nioqqutissalluunniit allat akitsuutaat pisortanut akilinnngitsoorneqartut akilinnngitsoorneqariartulluunniit aamma tigummigallaraneqarsinnaapput arsaarinnissutigineqarlutilluunniit, arsaarinnissutaasariaqartut pillugit maleruagassat eqqartuussisarnermi inatsimmi aalajangersarneqarsimasut malilluinnarlugit.”

13. § 29, imm. 1, ima oqaasertaqarpoq:

” Suliffeqarfiit timmisartukkut umiarsuakkullu angallassinermik ingerlataqartut, aamma angallatip naalagaa paasissutissat nakkutilliinerup isumagineqarnissaanut pisariaqartut, matumani aamma angallammut, inuttanut, ilaasunut taakkulu nassataannut nalunaarsorneqartunut kiisalu usinut tunngasut paasissutissiissutigissallugillu uppersarsassallugit, kiisalu lastimut, ininut toqqorsivinnullu iserfissat tamaasa takutissallugit ammassallugillu imaluunniit qulaassallugit pisussaapput. Akileraaruseriffiup eqqartuussivimmit akuersisummik peqanngikkaluarluni iserfissat taakku takutinneqarnissaat, ammarneqarnissaat qulaarneqarnissaalluunniit aammalu misissuiffiginissaat piumasarisinnaavaa.”

14. § 29, imm. 3, ima oqaasertaqarpoq:

” Imm. 3. Akileraaruseriffik inuit akitsuuteqarfiusumut akitsuuteqarfiusumiillu angalasut pillugit paasissutissanik selskabimut angallassisuusumut piumasaqarsinnaatitaavoq, matumani aamma selskabip angallassisup elektroniskiusumik paasissutissiiviinut isernikkut. Paasissutissat akileraaruseriffiup selskabip angallassisuusup paasissutissiiviinut toqqaannartumik isersinnaanermigut pissarsiai akileraaruseriffiup qarasaasiatigut atortuinut elektroniskiusumik nuunneqassanngillat toqqaannartumilluunniit toqqorneqassanatik.”

15. § 29, imm. 7, ima oqaasertaqarpoq:

” Imm. 7. Akileraaruseriffiup inuit angallammut isernissaat tassanngaluunniit aninissaat kiisalu nioqqutissanik eqqussisoqarnissaa annissisoqarnissaaluunniit, nakkutilliinerup naammassinissaata tungaanut inerteqqutigisinnaavaa.”

16. § 32 a, imm. 2, ima oqaasertaqarpoq:

” Imm. 2. Nunani allani sumiiffiit sumiiffillu Kalaallit Nunaanni akitsuuteqarfimmiittut akornanni ilaasunik angallassisarnissanik pilersitsisoqartillugu ininik pisariaqartunik atortulersugaasunik pisatsersugaasunillu, ilaasut il.il. misissorneqarnissaanni atugassiisoqarnissaa akileraaruseriffiup imminut aningaasartuutaanngitsumik peqqussutigisinnaavaa. Akileraaruseriffiulli isumagissavai atortunut, matumani aamma teknikkimut atortunut, ilaasut il.il. eqqussuinerannik nakkutilliinermi taamaallaat atorineqartussanut aningaasartuutit.”

17. Kapitali 8-p qulequtaa imaa oqaasertaqarpoq:

”Timmisartunut ilaasut nammineq piumassutsiminnik akitsuusiisitsisinnaanerat”

18. Kapitali 8-p qulequtaata kingornanut ilanngunneqarpoq:

” § 35 a. Nunamut maanga tikinnermi timmisartunut ilaasut nioqqutissat akitsuusigassat nammineq atugassamittut nassatatik nammineq piumassutsiminnik akitsuusertissinnaavaat, taamaattorli tak. imm. 2. Imm. 2. Nioqqutissanik, Nioqqutissanik eqqussuinermi akitsuutit pillugit Inatsisartut inatsisaanni § 1, nr. 3-mi, nr. 7-mi, nr. 8-mi, nr. 9-mi nr. 10-milu taaneqartunik nammineq piumassutsimik akitsuusiisitsinermi amerlassutsit tikinnermi akitsuuteqanngitsumik eqqunneqarsinnaasut tallimariaataannit amerlanerusinnaanngillat. Amerlassutsit tikinnermi akitsuuteqanngitsumik eqqunneqarsinnaasut

tallimariaataannit amerlaneruppata, amerlanaarlugit eqqussat arsaarinnissutigineqassapput.

Arsaarinnissutit Nunatta karsianut iluaqutissanngortinneqassapput.

Imm. 3. Nioqqutissanik imm. 2 naapertorlugu nammineq piumassutsimik akitsuusiitsisinnaapput inuit 18-inik ukiullit ukioqqortunerusulluunniit.

Imm. 4. Nammineq piumassutsimik akitsuusiitsinermit nioqqutissat akitsuusigassat nassarneqartut eqqussuinermit akitsuutaat kiisalu sullissinermit akiliisitsissut Naalakkersuisunit aalajangersarneqartoq 1.000 kr.-inillu anginerunngitsoq akilernerneqassapput. Tikittup akitsuut, sullissinermit akiliisitsissut immaqalu pillaaammik akiliisitsissut pineqartup nakkutilliivimmik qimatsisinnani akilinngippagit nioqqutissat Nunatta karsianut iluaqutissanngorlugit arsaarinnissutigineqassapput.”

19. § 46, imm. 1, ima oqaasertaqarpoq:

” Kinaluunniit akuersissummik pisariaqartumik peqarani piaarluneerluni mianersuaalliorujussuarlunuunniit nioqqutissanik § 7-imi, § 9-mi § 10-milu pineqartunik eqqussisoq imaluunniit nioqqutissanik § 35 a, imm. 2-mi pineqartunik nammineq piumassutsiminik akitsuusiitsisnani eqqussisoq pillaaammik akiliisinneqarsinnaavoq.”

20. § 46, imm. 3, ima oqaasertaqarpoq:

” *Imm. 3.* Akuersissummik pisariaqartumik peqarani nioqqutissat § 7-imi § 9-milu pineqartut eqqunneqarpata, nioqqutissalluunniit taamaattut nammineq piumassutsimik akitsuusertinnagit imaluunniit amerlassusissat § 35 a, imm. 2 naapertorlugu eqqunneqarsinnaasut sinnerlugit eqqunneqarpata nioqqutissat taakku, nioqqutissalluunniit peqanngippata taakku aningaasanngorlugu nalingat arsaarinnissutigineqassapput.”

21. § 46, imm. 5, ima oqaasertaqarpoq:

” *Imm. 5.* Aningaasat atoriaannaat 50.000 kr.-t sinnerlugit nalillit, akileraaruseriffullu § 30, imm. 4 aamma 5 naapertorlugit nakkutilliinerani nassaarineqartut akileraaruseriffimmit tigummigallarneqarsinnaapput. Tigumminnikkallarnek pisinnaavoq aningaasat atoriaannaat pinerluttulerinermik inatsimmik unioqqutitsinikkut pissarsiaasimasinnaanerit unioqqutitsinissamulluunniit atorineqarsinnaanerit pasitsaassimaneqarpat. Tigumminnikkallartoqartillugu eqqartuussisarnermit inatsimmi kapitali 37, arsaarinnissuteqartarnermut tunngasoq atuutissaq.”

§ 2

Inatsisartut inatsisaat atortuulerpoq ulloq 1. januar 2024, taamaattorli tak. imm. 2.

Imm. 2. § 1, nr. 18, nalunaarutikkut atortuulerpoq. Ullut atortuulerfiit assigiinngitsut timmisartoqarfinnut assigiinngitsunut attuuttussat Naalakkersuisunit aalajangersarneqarsinnaapput.

Namminersorlutik Oqartussat, ulloq 20. novembari 2023

Múte Bourup Egede (atsior.)

Naalakkersuisut Siulittaasuat

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut